


På kyrkjebakken

Redaksjonsnemnd:
B. Haukanes, B. D. Bødker, A. R. Hauge, J. Bruvik



Den nye biskopen gler seg til påskejubel

Ragnhild Jepsen blir vigsla som ny biskop i Bjørgvin første søndag etter påske, 16. april. Ho er framleis domprost i Nidaros domprosti, men me fekk ein liten samtale med biskopen som alt er utnemnd, men enno ikkje har kledd seg i bispekapå.

Ragnhild Jepsen har vore til stades i fleire bispevigsler tidlegare. Ho trur ein slik dag kan vera god å ha i ryggen seinare. — Det er mykje fest og fokus på ein person, og det er fint å ha med velsigninga, bønene og fellesskapet når kvardagen kjem med ulike krevjande situasjonar. Det er noko stort i det å bli sett og kjenne på kyrkja sitt tydelege ja til meg som biskop, eg ser verkeleg fram til den dagen. Eg er også veldig glad i å feire gudsteneste, og det blir flott å syngja påskesalmar denne første søndagen etter påske, seier ho.

— Er påska relevant i vår tid?
— Når me jublar påskedaga ut på første påskedag, er det på vegner av alt Gud har skapt som også skal bli nyskapt. Det som hende i påska med Jesu død og oppstode er det endelege beviset på at Gud har frelst sin skapning og har tru på mennesket og alt Han har skapt, seier den komande biskopen.

— Kva ser du fram til ved å bli biskop?

— Eg ser fram til på bli kjent i bispedømet og med menneska her, med kyrkjelydane, både tilsette og frivillige medarbeidrar. Eg ønskjer også å vera ei tydeleg stemme i kyrkja og på vegner av kyrkja, seier den komande biskopen. Ho er ikkje klar til å lansera noko særleg satsingsområde for sin eigen del. — Eg vil først av alt lytta meg inn til kyrkja og livet i Bjørgvin.

Den nye biskopen kjem frå Ål i Hallingdal. Ho har røter i Vestland, men har ikkje budd her før. — Eg gler meg til å flytte til Bjørgvin og ser fram til å bli kjent i byen og fylket. Det blir mykje nytt, ikkje minst det å etablere seg med eit nettverk, også på fritida, det er eit arbeid i seg sjølv, seier Ragnhild som med seg til bispebustaden på Landås har med seg ektemannen Einar Vegge. Han er pilegrimsprest i Nidaros, og har reist langs delar av kystpilegrimsleia i bispedømet vårt. Dette ser også Ragnhild fram til å få høve til. Dei har to vaksne born, Håkon og Ingjerd.

— Du syng i kor i Nidarosdomen, trur du at du får tid til å synga i kor i Bergen?
— Det skal vel godt gjerast. Eg har sunge i kor sidan eg var tre år, og viss det byr seg eit høve, seier eg ja, kanskje til eit prosjektkor?

Ragnhild Jepsen har vore prest i 25 år, først som kapellan i Åmot i



Ragnhild Jepsen gler seg til å bli vigsla som biskop i Bergen domkirke 16. april. (Foto: Gyrid C. Nygaard)

Østerdal, sidan som kapellan og sokneprest og frå 2011 domprost i Nidaros domprosti. — Dette har gjeve meg mange erfaringar og møte med menneske i sorg og glede som eg tek med meg. Eg har som prost også vore mykje med i rådsarbeid, bl.a. fellesrådet i Trondheim. Eg er oppteken av at både organisatoriske strukturar og alt det praktiske med bygningar og liknande gjev gode rammer for at kyrkjelyden kan driva sitt kyrkjelydsbyggjande arbeid, seier den nye biskopen.

Dei som har møtt henne, skjørnar at ho er glad i å vera saman med folk og ho fortel at ho, på same måte som andre i staben, ofte har vore vertskap for besøkande til Nidarosdomen, anten det er store eller små grupper.

— Kva har kyrkja å «tilby» til folk flest?
— Gode fellesskap der du kan koma uansett alder, funksjon eller prestasjon. Me skal også vera ein fortolkar av tida vår. Dersom me til dømes opplever

Frå kyrkjboka



Døypte

26.02.

Lilly Seljestad

12.03.

- Birk Aldal Andreassen
- Lotta Røen Ulland



Gravlagde

08.02.

Lillian Karin Ervik

10.03.

Per Arne Totland

barnefattigdom, korleis kan me då vera kyrkje på ein truverdig og evangelisk måte? Dette må skje lokalt, men det er viktig å ha støtte frå bispedømet. Eg synest det er viktig at kyrkja, som ein del av lokalsamfunnet, spelar saman med lokale organisasjonar, skular og grupper. Eg vil også oppmuntra om å byggja kristne fellesskap der me samlast om det som er umisseleg for oss.

Bispekontoret

Barnesong i kyrkja

Søndag 19. mars hadde me besøk av eit stort barne-kor i kyrkja på Haga.

42 born hadde vore i Sætravika på leir sidan fredag, og øvd inn fleire songar dei ville dela med oss. Dei var også føresongarar både på liturgi og salmar i gudstenesta, og imponerte oss storleg. «Aldri har liturgien vore så fin som i dag», sa David prest til borna.

Det var Ung kirkesang Vest som arrangerte leiren og dei hadde med seg born frå korskolen i Biskopshavn, Bergen domkirkes barnekor, Slettebakken barne og ungdomskor, og barnekor frå Utne, Øystese, og Dale. Musikalsk leiar var Tonje Eriksen frå korskolen, og vår eigen kyrkjemusikar, Torgeir Kinne Solsvik, var med dei som pianist.

Både den lokale kyrkjelyden og alle foreldra som kom for å høyra på, gledde seg over flott barnesong og sjokoladekakene fekk bein å gå på til kyrkjekaffien etterpå. Me gler oss til neste kor-leir og håpar dei vil dela song-gleda med oss då også!

B.H.

